

আজি প্রেমানন্দে মন রে গাহ রামকৃষ্ণনাম ।  
গাহ রামকৃষ্ণনাম জপ রামকৃষ্ণনাম  
নাম সুধাপানে রহ মত্ত অবিরাম ।।

কামারপুকুর হ'ল পুণ্য ব্রজধাম  
সখাগণ লয়ে খেলে লীলা অবিরাম  
(যেন) মানস-পুকুরে ভাসে সে ছবি সূঠাম ।।

নমো নমো চন্দ্রাদেবী নমো ক্ষুদিরাম  
কৃপাময়ী মা জননী লহ গো প্রণাম ।

জয়রামবাটীর মাটি চন্দন সমান  
আমার মা জননীর জন্মভূমি মহাতীর্থস্থান  
মায়ের চরণে শরণ নিলে পুরে মনস্কাম ।।

- প্রমথনাথ গাঙ্গুলী -

পরম গুরু সিদ্ধ যোগী মাতৃভক্ত যুগাবতার ।  
পরমহংস শ্রীরামকৃষ্ণ লহ প্রণাম নমস্কার । ।  
জাগালে ভারত শ্মশাণ তীরে, অশিবনাশিনী মহাকালীরে;  
মাতৃনামের অমৃতনীরে ভাসালে নিজ ভারত আবার । ।  
সত্যযুগের পুণ্যসূতি, আনিলে কলিতে তুমি তাপস,  
পাঠালে ভারত দেশে দেশে ঋষি-পুণ্য-তীর্থ-বারি-কলস ।  
মন্দিরে মসজিদে গীর্জায়, পূজিলে ব্রহ্মে সমশ্রদ্ধায়,  
তব নাম মাখা প্রেম নিকেতনে ভরিয়াছে তাই ত্রিসংসার । ।

- নজরুল ইসলাম -

জয় বিবেকানন্দ সন্ন্যাসীবীর চীর-গৈরিক-ধারী  
জয় তরুণ যোগী শ্রীরামকৃষ্ণ-ব্রত-সহায়কারী ।  
যজ্ঞহুতির হোম-শিখাসম, তুমি তেজস্বী তাপস পরম ।  
ভারত-অরিন্দম, নমো নমঃ, বিশ্ব-মঠ-বিহারী । ।  
মদগর্ভিত বল-দপীর দেশে মহাভারতের বাণী  
শুনায়ে বিজয়ী ঘুচাইলে স্বদেশের অপযশ গ্লানি ।  
নব ভারতে আনিলে তুমি নব বেদ, মুছে দিলে জাতি ধর্মের ভেদ;  
জীবে ঈশ্বরে অভেদ আত্মা জানাইলে উচ্চারি । ।

- নজরুল ইসলাম -

বলরে জবা বল -

কোন্ সাধনায় পেলি শ্যামা মায়ের চরণতল?  
মায়া তরুর বাঁধন টুটে, মায়ের পায়ে পড়লি লুটে,  
মুক্তি পেলি, উঠলি ফুটে আনন্দবিহ্বল ।  
তোর সাধনা আমায় শেখা জীবন হোক সফল । ।  
কোটি গন্ধে কুসুম ফুটে বনে মনোলোভা -  
কেমনে মার চরণ পেলি তুই তামসী জবা;  
তোর মত মার পায়ে রাতুল হব কবে প্রসাদী ফুল  
কবে উঠবে রেঙে ওরে মায়ের পায়ের ছোঁয়া লেগে,  
কবে তোরই মত রাঙবে রে মোর মলিন চিত্তদল । ।

- নজরুল ইসলাম -